

Sedia garis panduan kawalan vape

Oleh **FAUZI SUHAIMI DAN SITI NURSYAKIRAH SAHARUDIN**
utusan@utusan.com.my

■ KUALA LUMPUR 23 JULAI

KERAJAAN disaran menyediakan garis panduan khas melibatkan penguatkuasaan dan pengawal seliaan penggunaan vape bagi memastikan perkara tersebut tidak disalahguna sesetengah pihak.

Presiden Dewan Pemiagaan Vape Malaysia (DPVM), Syed

Azaudin Syed Ahamad berkata, garis panduan tersebut perlu memperincikan beberapa perkara penting termasuk mengharamkan penjualan rokok elektronik (e-rokok) kepada individu di bawah umur 18 tahun sekali gus menghadkan kandungan nikotin pada kadar bawah enam miligram.

Tegasnya, DPVM meminta agar pihak berkuasa mengambil tindakan tegas terhadap peniaga yang menjual vape kepada individu di bawah umur sama ada secara dalam talian mahupun di

premis.

“DPVM telah mengadakan beberapa perbincangan bersama beberapa agensi kerajaan dan Kementerian untuk membincangkan soal penguatkuasaan dan pengawal seliaan vape di negara ini.

“Berdasarkan perbincangan dengan pihak Kementerian Perdagangan Dalam Negeri dan Hal Ehwal Pengguna turut meminta agar satu garis panduan aktiviti pengeluaran, pengedaran dan peruncitan peranti yang dikeluarkan pada 1 April 2018 masih

diguna pakai sehingga kini dan pihak mereka masih menggubal dan meminda akta-akta sedia ada bagi melaksanakan kawalan penguatkuasaan mandatori sepenuhnya pada tahun hadapan,” katanya kepada *Utusan Malaysia* di sini hari ini.

Laporan khas *Mingguan Malaysia* Ahad lalu mendedahkan gejala menghisap vape dalam kalangan pelajar kian serius dan semalam Timbalan Perdana Menteri, Datuk Seri Dr. Wan Azizah Wan Ismail meminta agar

penjualan vape kepada pelajar perlu dihentikan bagi mencegah penularan dalam kalangan kanak-kanak.

Dalam pada itu, Syed Azaudin berkata, Perlembagaan DPVM turut menjelaskan setiap ahli perlu mematuhi garis panduan dan undang-undang yang dikeluarkan oleh kerajaan.

“Oleh itu, kami juga akan keluarkan pekeliling melarang semua peniaga vape menjual kepada semua individu di bawah umur,” ujarnya.